

Akileraartarnikkut inatsisit missiliuussinikkut angissusiliisarnermi, innuttaasut pisortanut naammangittaaliornerminni uppernarsaasussaajunnaarnissaat pillugu naleqqussasaanersut pillugit oqallisissiatut siunnersuut
(Inatsisartunut ilaasortaq Pele Broberg, Naleraq)

Akissuteqaat

(Aningaasaqarnermut Akileraartarnermullu Naalakkersuisoq)

Aallaqqaasiullugu Inatsisartunut ilaasortaq Pele Broberg apeqqutaat aallaavigalugu oqallinnermut Naalakkersuisut sinnerlugit qujaffigaara.

Inuiaqatigiittut atugarissaarnerput immitsinnut pilersornertigut tunngaveqarpoq, taamaasilluta tamatta inuiaqatigiinnut tapersiilluta. Tamanna attatsiinnarneqassappat, tamatta akileraarutitsinnik akitsuutitsinnillu akiliisariaqarpugut. Tamanna aamma isumaqarpoq, inuiaqatigiittut atugarissaarnerput attatsiinnarneqassappat, ataatsimoornitsinnut akileraarutitigut minnaariniartoqassanngilaq, soorlu akileraarnani sulilluni.

Apeqquteqaat aallaavigalugu oqallisissiami akileraarusersueriaatsitsinni eqqartuinissaq pingaaruteqarluinnartoq apeqquserneqarpoq. Oqallisissiali aamma nammineerluni nalunaarsukkanik amigaatilinnut ilungersunartorpassuit aamma sammineqartilerpai.

Ukiut tamaasa nammineerluni nalunaarsukkamik tunniussinissamut, isertitatsinnillu paasissutissiinissamut pisussaaffeqartarpugut. Tamanna akileraaruserinermik ingerlatsineq pillugu inatsimmi § 16 aamma 17 malillugu pisarpoq.

Namminersorlutik inuussutissarsiortut namminneerlutik nalunaarsukkaminut peqatigitillugu ingerlatsinermut naatsorsuutiminnik tunniussisussaapput. Tamatumalu kingunerisaanik akiligassinneqarnerit imaluunniit utertoorujussuarternerit pisinnaasarlutik. Taamaangippat kaaviiartitat ukiumut 1 mio. kr.-nit annikinneruppata, skema atorlugu pisariinnerusumik inernernik naatsorsuiffik immersorsinnaavaat. Namminersorlutik inuussutissarsiortut suliffeqarfiillu naatsorsuutitut bilaginik ukiuni tallimani toqqortaateqarnissamik pisussaaffeqarput.

Paasissutissat taakku akileraarusiinermi toqqammaviusarput, aningaasartuutillu ilanngaatigineqarsinnaatitaasut ilanngaatigineqarsinnaasarput.

Kikkut tamarmik malittarisassanik naammassinnikkaluarpata, missiliuussinikkut angissusiliisarnerit pisariaqartinneqassanngikkaluarput. Ajoraluartumilli akulikippallaamik innuttaasut suliffeqarfiillu nammineerlutik nalunaarsukkat naammangitsut tunniuttarpaat. Ukiut tamaasa missiliuussinikkut angissusiliisarnerit 1.000-t missaat nassiunneqartarput,

namminersorlutillu inuussutissarsiortut tamarmiusut 20 procentii missiliuussinikkut angissusiliivigineqartarput.

Taakku tassaasinnaapput ingerlatseqatigiiffiit namminneerlutik nalunaaruteqanngitsunit innuttaasunut inissiamik attartortitsinermik isertitanik paasissutissiinngitsut, imaluunniit assersuutigalugu Facebookikkut kaaginik tuniniaanermi isertitanik paasissutissiinngitsut.

Ilaatigulliuna taamaattoqartillugu Akileraartarnermut Aqutsisoqarfik inaarutaasumik naatsorsukkanut toqqammaviusinnaasumik, akileraarutinullu akiligassiisnaajumalluni missingiussaqaqtariaqartartoq.

Missiliuussinikkut angissusiliisarnermik atorunnaarsitsineq akileraarusersueriaatsimut pitsaanngitsorujussuarmik kinguneqassaaq. Nunatta Karsia kommunillu karsii innuttaasut suliffeqarfiillu nammineerlutik nalunaarutinik nassiussinissamat, uppersaatinillu toqhortaateqarnissamat piumasqaatinik naammassinninnginneranni, akileraarutitigut annertoorujussuarnik annaasaqassapput. Taamaattoqanngippat sulisunik amerlanerungaartunik innuttaasut suliffeqarfiillu isertitaannut tunngasunik misissuisussanik, uppersaatinillu pissarsiortussanik atorfinitsitsisoqartariaqassaaq.

Missiliuussinikkut angissusiliisinnaaneq atorunnaarsinneqassappat, tamanna akileraartartut naligiinngitsumik sullinneqarnerannik kinguneqarsinnaavoq, tassani inatsisinik naammassinnittut nammineerlutik nalunaarsuinermit akileraarutinillu akiliinermut piffissamik isumalluutinillu atuisariaqassapput, sinnerisalu inatsit malinniarnagu toqqaannarsinnaalissavaat.

Naak tamatta pisortat ikiorsiissutaannik akileraartartunit aningaasalersorneqartunit iluaquteqaraluartugut, piviusumi ikinnerit akiligassanik akiliisalissapput. Nalinginnaasumik akiligassaq annertunertigut sulinermit inuussutissarsiortumut aalisartumullu namminersortumut akissarsiaminnit akileraarutinut ilannganneqartartunut tuttalissaaq.

Akileraarutinut akiliinaveersaarnerup saniatigut akileraartarnermi malittarisassanik unioqquutitsinerit isertitaminnik nammineerlutik nalunaaruteqartunut sanilliullugu, inuit ilaasa ineqarnermut tapiissutinik amerlanernik tiguisarneranik, paaqqinnittarfinnulluunniit akiliinikinnerulernerannik malitseqassaaq.

Innuttaasut assigiinngisinnerarlutik misigitillugit, tamatuma aamma akileraartarnermut aaqquissuussinerup tamarmiusup tutsuiginassusaa akornuserneqarnera malitsigisarpaa. Amerlasuut akileraarutinut akiliineq ajorpata, sooq uanga akiliissaanga? Tamanna pissutsit nakkaakkiartornerannik malitseqarsinnaavoq, taamaattoqarneranilu inuit amerlanerugaluttuinnartut malittarisassanik malinnikkunnaassapput.

Inuiaqatigiittut tamanna inooqataaffigisinnaanngikkippat Naalakkersuisut isumaqarput. Tamanna nunatsinni innuttaasunut ingerlatseqatigiiffinnullu amerlanerussuteqartunut, ullumikkut nammineerlutik nalunaarsukkanik tunniussisartunut, akileraarutiminnillu akilersuiuartunut naapertuuttuliornerunngilaq.

Nammineerluni nalunaarsukkanik tunniussititsiumalluni periarfissaq alla tassaavoq akiligassiinernik annertuumik annertunerulersitsinerup isumaliutigineqarnera. Tamanna ullormut akiligassat qaffasinnerisigut, kiisalu naammaginartumik nammineerluni nalunaaruteqannginnikkut pinerluttunut inissiisarfinnut inissiinikkut pisinnaavoq. Taamaalilluta ullumikkornit inuit suliffeqarfiillu amerlanerusut pinerluttunngortissavagut, kiisalu politiinut eqqartuussisunullu suliakkiussanik nammakkiinerulerluta.

Siunnersuuteqartoq tulliullugu matumani naapertuutinnngitsumik equititsisoqarneranik, Akileraartarnermullu Aqutsisoqarfiup missingiussinermini, akileraartartumut uppersaasiinissamik peqqussutaasumut sanilliullugu uppersaasiisarnerata assigiinnginneranik isumaqarpoq.

Tassunga atatillugu innuttaasup suliffeqarfiulluunniit kisimi nammineerluni isertitaminut tunngassuteqartut ilisimallugillu uppersarsinnaagai oqaatigineqassaaq. Taakku siullertut missingiussilluni annertussusiliisarneq nammineerluni nalunaarsukkanik tunniussinermikkut, uppersaatinillu toqqorsinermikkut pinngitsoortissinnaavaat.

Akileraartarnermut Aqutsisoqarfik missingiisarnermini paasissutissat pissarsiarineqarsinnaasut aallaavigalugit sapinngisamik eqqornerpaamik annertussusiliinartarpoq. Tamatta akileraarummik akilissallugu pisussaaffigisatsinnik akiliinissatta qularnaarnissaa Akileraartarnermut Aqutsisoqarfiup qularnaagassaraa.

Missingiinerit malittarisassat ersarissut malillugit pisarpoq, tassani tusarniaanerit ilanngullugit. Taamattaarlu Akileraartarnermi Siunnersuisooqatigiinnut, namminersorlutik inuussutissarsiortunit, sulisartut kattuffiinit kommunillu sinniisaannik toqqakkanik inuttaqartumut, akeqanngitsumik maalaaruteqarsinnaaneq periarfissaavoq.

Taamaalillutik missingiussilluni annertussusiliivigineqartut annertuallaamik annikippallaamilluunniit missingiussilluni annertussusiliivigineqartut, annertussusiliivigineqarnermik aaqqinnissaannut periarfissanik atorneqarsinnaasunik naapertuuttunillu tamanik atuinissamut periarfissaqarput.

Innuttaasut amerlavallaartut ukiut tamaasa missingiussilluni annertussusiliivigineqartarnerat Naalackersuisut isumaqatigaat. Immikkoortunilu amerlasuuni iliuuseqarnissamut pisariaqartitsisoqartoq Naalackersuisut isumaqarput: Ingammik namminersorlutik inuussutissarsiortunut paasissutissanik annertunernik peqarnissaq pisariaqartinneqarpoq. Naatsorsuuserisut amerlanerit innuttaasut naatsorsuusernerannut ikiuussinnaasut pisariaqartinneqarput. Aammali akileraartartut ilaanni isummertaatsip allanngornissaa pisariaqartinneqarpoq.

Amerlanerit eqqortumik nammineerlutik nalunaaruteqartartuuppata, tamanna Akileraartarnermut Aqutsisoqarfimmi isumalluutininik allanut atuisinnaanngortitsissaaq. Isumalluutit taakku ilitersuilluarnernermut pisunilu akileraarnaveersarnermut tunngasunut iliuuseqarnermut atorneqarsinnaassagalarput. Ineriartorneq taamaattut tamatsinnut iluaqutaassaaq.

Taama oqaaseqarlunga oqallilluarnissamik kissaappassi.